



SALIH JALOVČIĆ, inž.geodezije

Poslije duže bolesti prestalo je dana 18.3.1987.godine da kuca plemenito srce penzionisanog dugogodišnjeg radnika Geodetskog zavoda u Sarajevu i Krajina-premjera u Banja Luci.

Sahrana posmrtnih ostataka obavljena je u Banja Luci dana 20.3.1987.godine uz prisustvo njegovih brojnih prijatelja i kolega iz cijele Republike. Tom prilikom, od druga Salih u ime kolega Krajina-premjera se oprostio Lukić Ilija, a u ime kolega ispred Geodetskog zavoda, njegov školski kolega Dervišić Muhamed.

Drug Salih je rođen u Trebinju 11.11.1929.godine, gdje je završio osnovnu školu i gimnaziju, poslije čega prelazi u Sarajevo u Srednju tehničku školu - geodetski odsjek i završava 1949.godine. Uz redovan rad i pored već načetog zdravlja, završava vanredno Višu geodetsku školu u Sarajevu.

Po završetku školovanja odlazi na odsluženje vojnog roka u školu rezervnih oficira JNA, a poslije toga počinje njegov radni vijek u Operativi Republičke geodetske uprave u Sarajevu.

Njegovo prvo zaposlenje je u preduzeću "Georad" do 1952.godine, zatim u okviru Republičke geodetske uprave radi u Sekciji Banja Luka do osnivanja Geodetskog zavoda 1962.godine. Po osnivanju preduzeća Krajina-premjer postaje njegov član odakle odlazi u invalidsku penziju.

U toku svog dugogodišnjeg samoprijegornog rada, drug Salih je neprekidno usavršavao sebe, a svoje mlađe kolege

sistematski je podučavao i uvodio u tajne geodetske struke kao iskusan radnik i kao roditelj.

Bio je na radilištima širom Bosne i Hercegovine, kao i Hrvatske, na Novom premjeru, popisnom katastru i gradskim premjerima kao čestit i primjeren radnik kao izvodjač, tehnički kontrolor, instruktor i rukovodilac u opštinama: Vukovaru, Slavonskom Brodu, Bosanskoj Gradišci, Prnjavoru, Derventi, Tešnju, Banovićima, Tuzli, Titovom Drvaru i mnogim drugim mjestima, zadržavajući se preko cijele terenske sezone, i uvijek je bilo koji zadatak ma kako on bio težak i odgovoran sa voljom i sa uspjehom završavao. Krasile su ga brojne vrline: radinost, lično poštenje, iskreno drugarstvo i uzorno ponašanje, kojima je bio obdaren kao primjerna ličnost medju kolegama i prijateljima. Teško je naći primjera muža i roditelja kao što je bio drug Salih i njegove neizmjerne ljubavi prema supruzi Fethiji i djeci Esmi i Husi kojima je svojim radom i plemenitošću omogućio da izrastu i postanu korisni akademski građani ovog društva.

Drug Salih je pored radnih obaveza bio i aktivan u društveno političkim i samoupravnim organima, te je kao takav bio prvo skojevac, pa član SKJ i više puta biran u Samoupravne organe u radnim organizacijama u kojima je radio. Odlikovan je Ordenom rada sa srebrenim vijencem 1983. godine.

Smrću druga Saliha Jalovčića, njegovi prijatelji i kolege izgubili su dobrog i iskrenog druga, a sjećanje na njega ostaće nam vječna uspomena.

Hvala ti na svemu, dragi naš Salka, neka ti je vječna slava i hvala.

Muhamed Dervišić